



Episcopal Commission on Clergy

Wali alang sa Domingo ni San Juan Maria Vianney

Agusto 4, Ika-18 nga Domingo sa Ordinaryong Panahon

Ang ika-napulog walo nga Domingo sa Ordinaryong Panahon mao ang Domingo ni San Juan Maria Vianney. Atong gihandom og gi-ampo ang tanang mga Pari sa iyang panalipud og giya niining misa. Ato usab nga i-ampo ang tanang mga Batan-on. Ang tuig 2019 gigahin alang sa mga Batan-on uban sa tema: “Pilipinong Batan-on nga Nanagmisyon: Gihigugma, Gigasahan, Gitugahan”.

Si Jesus niingon sa Ebanghelyo ni San Juan, “Sama nga nahigugma kanako ang Amahan, ako usab nahigugma kaninyo; pabilin kamo sa akong gugma” (Jn 15:9). Kining mga pulonga nga gisulti ni Jesus sa iyang mga tinun-an, gisulti usab niya sa tanan nga buot maminaw, ilabi na sa mga batan-on. Lakip sa mga batan-on ang mga batan-ong pari nga nag-alagad sa mga parokya og sa nagkadaiyang mga institusyon. Ug tungod kay ang gugma sa Diyos naglangkub man sa tanan, kini gidalit sa tanan. Ang tanan Gihigugma.

Ang gugma magdalag gugma. Ang mga batan-on nga natawo og gipadako diha sa gugma mas abli nga mahimong tawo-alang-sa-uban. Ang mga nakasinati og gugma sa atong panimalay, kasilinganan, tunghaan og simbahan, nga mauy mga sinugdanan sa bokasyon, mamahimong maagni sa pagka-pari, pagka-relihiyoso o dalaga/ulitawo nga balaan. Mamahimo usab sila nga mga mahigugmaong ginikanan kung mupili sila sa kaminyuon.

Ang pagkagigasahan hiyas sa kabatan-on. Usban ko, kining maong gasa gikan sa Diyos. Apan ang pari gigasahan usab. Nadawat sa pari ang iyang bokasyon sa paghimong buhi ni Kristo diha sa katilingban gikan mismo kang Kristo. “Dili kamo ang nagpili kanako, apan ako ang nagpili kaninyo ug nagtudlo kaninyo arun kamo molakaw og mamungag daghan—bunga nga mulungtad—og arun ang bisan unsay inyong pangayuon sa Amahan sa akong ngalan ihatag niya kaninyo” (Jn 15:16). Gipahinumduman ang mga batan-on og mga pari niining maong kamatuoran. Ang tanan gasa. Ang mga adunay lawum og pagsabot nga ang tanan nilang gihuptan, apil na ang ilang pagkatawo, gasa gikan sa Ginoo makakita sa tanang butang sa saktong pamaagi. Naangkon nila ang hiyas sa pagkamalinawun og pagtugyan sa kabubut-on sa Ginoo kay nasayud man sila nga ang Ginoo na’y bahala sa tanan nilang panginahanglan, nan gitugyan nila ang tanan sa kabubut-on sa Ginoo. Bali kini sa gibuhat sa adunahang lalaki sa Ebanghelyo sa pagtago niya sa tanang trigo og bahandi sa dagkong mga kamalig uban sa pagsalig nga kining tanan mauy tubag sa tanang niyang panginahanglan sa kinabuhi, apan wala diay siya masayud nga matapos ang iyang kinabuhi diha gayung gabhiuna. Alang kaniya, ang tanan kawang lamang sama sa gisulti sa unang pagbasa. Mapuno siguro nimo ang tanan nimong dagkong mga kamalig, apan kung imong kaugalingon lamang ang imong gihuna-huna, usa lamang kini ka dakong binuang, kawang lamang kini.

Mau nga si San Pablo nagpahinumdum sa mga taga-Colosas sa ikaduhang pagbasa sa pagpanganduy sa butang langitnon og dili sa mga butang nga kalibutanon. Gi-agda kita niya sa pag-isip sa mga parte sa atong lawas nga “patay sa kahilayan, kahugawan, kaulag, dautang tuyo, og kahakug nga musangput sa mga dios-dios.” Ngano man? Tungod lagi kay kining tanan kawang lamang. Atong biyaan sa kalibutan ang mga butang kalibutanon. Sa katapusan, wala kitay laing madala kundi ang Gugma. Ang atong gugma sa Diyos og sa atong isig ka tawo lamang ang magpabilin. Matuod gayud ang panultihun nga ang atong bahandi dili kadtong atong nahipus para sa atong kaugalingon, apan kadtong atong napaambit sa uban. Kay ang gugma dili gugma kung dili kini ihatag.

Ang mga batan-on og ang mga pari parehong gitugahan. Ang Espiritu Santo nga nadawat sa bunyag naghatag og gahum sa mga batan-on sa pagpaka-anak sa Diyos. Ang Espiritu Santo nga nadawat sa

ordinasyon sa pagkapari usab naghatag og gahum sa pari sa pagpangalagad sama ni Cristo. Ang tinubdan sa pagkagitugahan sa duha mau ang Espiritu Santo alang sa pag-alagad sa katawhan sa Diyos.

Maminaw kita ni San Juan Maria Vianney, patron sa mga pari: “Unsa man ang pari? Usa ka tawo nga nibarug alang sa Diyos—usa ka tawo nga gitugahan sa tanang gahum sa Diyos. ‘Lakaw,’ ingon ang atong Ginoo sa pari. ‘Sama nga gipadala ako sa Amahan, ako nagpadala kanimo. Gihatag kanako ang tanang gahum sa langit og yuta. Lakaw og sangyaw i ang tanang nasud... Siya nga maminaw kanimo, maminaw kanako; siya nga magsalikway kanimo, magsalikway kanako. Kung ang pari mupasaylo sa sala, dili siya muingon, ‘Gipasaylo ka sa Ginoo;’ kundili muingon siya, ‘Ako nagapasaylo kanimo.’ Sa Konsagrasyon, dili siya muingon, ‘Kini mao ang Lawas sa atong Ginoo;’ kundili muingon siya, ‘Kini mao ang Akong Lawas.’ (*Catechism on the Priesthood by St. John Vianney*).

Nianang paagiha gitugahan ni Cristo ang pari. Mau nga mag-ampo kita nga ang mga kaparian mugamit sa maung gahum sa pagdala sa buhing Cristo ngadto sa katawhan: sa pagpasaylo sama sa pagpasaylo ni Cristo, sa pagbuhong sa mga matuohon sa Pulong og sa Lawas ni Cristo, sa paghalad niya sa pag-alagad sa katawhan sa Diyos sama ni Cristo, og sa pag-duyog kang Cristo nga miula sa iyang lawas og dugo alang sa kapasayluan sa mga sala.

Apan sa laing bahin, kining pagka-gitugahan ni Cristo sa atong mga pari magamit nila sa dili saktong paagi. Gitawag kini ni Papa Francisco og ‘clericalism’. Para niya, mahitabo ang *clericalism* kung isipon sa mga pari nga labaw sila sa ordinaryong Cristiayo, nga aduna sila’y linaing luna, nga angayan lamang silang tagaan og mga pabor, nga nakahibaw sila og unsay makaayo sa ilang katawhan mau nga dili maayong supakon ang ilang mga desisyon. Apil sa *clericalism* ang pag-salmot sa pari sa usa ka eksklusibo og gamay nga hugpong sa kaparian nga dili mupaambit sa ilang gahum sa uban, nga magnilabanay sa usag usa kung adunay mubatok o mubiy-biy kanila.

Alang kang Papa Francisco, unsa may angayang buhaton sa mga pari arun dili sila mahulog niini? Ang pamaagi mau ang pagpabiling duol sa mga tawo, ilabina sa mga kabus og mga dinaug-daug sa katilingban. Sa usa sa iyang mga wali miingon siya nga ang mga pari pariho gyud unta og baho sa iyang mga karnero.

Nining tuiga nga gigahin alang sa mga Batan-on, hinaut nga ang atong mga pari mahimong sulundun alang kanila. Hinaut ang mga Batan-on makakita ni Cristo sa atong mga pari, madani unta sila pagsunod kang Cristo pinaagi sa ilang panig-ingnan, og magdani usab unta kinig daghan pang bokasyon sa pagkapari arun nga mas daghan pang mga tawo ang makasinati sa presensya ni Cristo pinaagi sa pagpangalagad sa atong mga pari. Mahimo untang modelo og giya si San Juan Maria Vianney sa atong mga pari sa ilang kinabuhi sa paghatag og pag-ula sa ilang kaugalingon.

San Juan Maria Vianney, i-ampo mo ang among mga pari og mga Batan-on.

Maria, inahan sa tanang kaparian, i-ampo mo kami. Amen.



+ BUENAVENTURA M. FAMADICO, D.D.

Bishop of San Pablo

Chairman-Episcopal Commission on Clergy

July 31, 2019